

悔易堂集
單

詩 疏 書

5563.7
4015

狀 序 墓誌 祭文

附錄

PERCIVAL
LIBRARY
UNIVERSITY OF
CALIFORNIA

DHEW

悔易堂文集序

相古先聖王之爲治也夙
夜憂勤芻求俊彥隨其才
而器使之如匠之用木棟
梁榱桷各適大小君有則
哲之明臣感知已之恩歡

然交欣相得益章去安有
不治者邪噫由今日觀

宣仁之世可謂聖德天縱
亦有忠良明智之臣並作
股肱心膂保乂王家以成
反危為安易亂為治之績

而悔易堂朴公即當日百
僚之一也公以水西肖子
彼三松畫獅之托資品粹
美學問開益與愚伏蒼石
忘窩鶴沙諸賢道義切磋
內至忠信所行合宜親之

而仁民賑施任卹祿俸無
儲而自奉則寒士如也追
遠之誠老而彌篤義方之
訓重申不校何莫非真心
實德之推邪若使得其位
行所學其功名事業將見

伯仲於股肱保乂之某々
諸公而惜乎白首郎潛終
不能大有為而仁心仁政
僅施於三四岩邑之民此
無異棟樑之材斲少之為
榱桷之用豈非所謂惟帝

其難者邪然而公且不卑
小官職思其居或出或處
必求所以潔其身者可見
其大過人者也葛庵先生
銘其墓曰詩著溫人維德
之基款々其行循々其政

新野李公撰奉安文曰英
才篤學趨向既正其盡之
矣公詩文不許蓄稿久愈
蕩逸今此收輯雖極零星
而皆平順理勝絕無季世
浮囂之色可知有德者言

其中傷春辭及次老杜北
征韻多慷慨激烈之意皆
經丙子志士之懷固當甬
也後孫寢郎世鉉將鏹梓
以壽之請一語以識之余
固匪人但以平日讀史至

人君輕才使臣賢臣無可
用力處未嘗不三復歎恨
乃敢不揆僭妄略道一二
如右歲壬子秋九月下浣
通訓大夫前行弘文館副
校理知製敎無經筵

侍讀官春秋館記注官東

學教授真城李晚燧書

悔易堂集目錄

卷第一

辭

次家兄東川公璫傷春辭

附原韻

詩

次家兄韻

原韻

次贈茶山睦大欽

水雲亭三首

次家兄雲字韻

次琴克成是諸臘梅韻

次韻呈家兄

原韻

夜讀心箴有感

詠松

安弦上京口占贈別

拓窓對老人峯

清涼山口占

白雲洞敬次慎齋周先生韻

仙槎鈴齋見舍兄書拈韻述懷

春夜偶吟

過園隱鄭先生遺墟曠然有感

登小白山

謹次五峯李相公好閔碧荷亭韻

挽金季晦

挽權行甫景行

挽金元伯首善室內真城李氏

望海亭賞軟綠行酒贈宋順之民古

壬申十月七日曉發至春川二江合流

處追次壬戌過此時五言巨語韻

和朴仲植檜茂林庄梅花詩韻

次宋珍山子潑光心韻

送閔景愚希顏赴任海美

次安詩四韻

挽再從侄掌令敦復

挽南仁瑞勳慶

萬曆甲辰晦齋李先生辨誣疏行時與

疏首金公允安李汝翕徽音金逢吉

止善朴季直樸茂李中立蔣李師聖

歲同畱泮邸久旅中不禁愁抱因拈

韻聯句性之疏首丈表德

次舍兄寄詩

挽吳景虛汝櫟

挽權子止黠

挽金溪巖冷

挽成濟州安義

挽人

次韓文公人日登高韻贈宋珍山

用東坡次淵明九日閒居韻

送金子綏益禧赴鳳山

次杜草堂憶昔行

次杜草堂水宿遣興二十韻

自鳳陽抵杭谷阻水三日聞 大行大

王賓天 新上卽祚哀情逢吉語還

家後次老杜北征詩示諸兒

次梅字韻

傷時作

姑蘇臺

舒川郡齋獨酌無聊奉呈伯兄以道相

思之情

鈴齋偶吟

有感

集句

春夜寫懷集古人句

惜花集句

次黃景輝養心堂諸詠

次權子守韻

挽金恩窩孝仲榮祖

挽安察訪崇儉

挽金伯溫環

挽秦正郎毅伯尚弘

挽權通禮斗文

挽宋僉知榮發

挽李而榦成祀

自英陽入寧府道中聯句

白雪歌送權宅甫赴關東幕

疏

豐基郡守時請救民弊疏

書

上尹方伯暄

狀

冬至呈巡相狀

呈統相狀

呈兵使狀

序

送李容伯崇音赴梓原序

巨樹洞約案序

義穀序

墓誌

祖妣朱淑人墓誌

祭文

龍堂祈雨文

祭外祖考三松先生文

祭裴判官益哉文

祭吳敬庵景虛文

祭李文興門文

祭琴兄佑聖文

祭南仁瑞文

祭公室淑人邊氏文

卷第二

附錄

行狀

家狀

墓碣銘

花川別祠奉安文

常享祝文

別祠重建上梁文

挽詞三

祭文四

贈遺

綠玉杖序

送朴潤甫赴任基川序

朴潤甫來松巖共話

畏影堂次悔易先生憶昔行韻

敬次憶昔行韻

奉贈悔易老兄拜 恩之京

呈城主朴公遞還行軒

跋

悔易堂集目錄終

悔易堂集卷之一

辭

次家兄東川公璫傷春辭

東風兮歸來時序屬兮芬芳雨祈祈兮土賦百
物樂於思滂方三春之布仁徵古治於存羊補
不足於省耕願遊豫兮吾王躋一世兮春臺治
道至兮馨香同萬古兮麗日吾何爲兮獨傷不
在先兮不在後我生逢兮此辰假強胡兮苦寒
天憚怒兮不仁勢蒼黃兮事去哀一城之君臣
無人修兮捍難舉國蒙兮腥塵山河異兮流離

瑣首尾兮生民同八路而慘目不似春於今春
心如波兮愁如雪我所思者非夷安稷契於廟
堂壯鎖鑰於邊陲遠夷懼於威德近者悅於邦
畿得民心而固國雖百清其奚危俱曰聖於謀
國計孰知於是非兼萬情之悲歡茲掛一於短
辭

原韻

東川公

麗日遲兮暘谷百草生兮芬芳獨悵悵兮無
歡心搖搖兮淚滂滂何皇天不助順兮率土
濱而犬羊素車兮白馬辱奚止於吾王柳何

爲兮嫩金梨何爲兮雪香欲舉目兮山河紛
觸物兮增悲傷昔宣祖之末年海寇劇兮
壬辰精誠足以動天荷上國之深仁挾天
威兮薄伐多效死之武臣同一心之殉國掃
八路之腥塵宗社安兮如舊奠魚肉之生
民慶再造之藩邦民物欣兮春復春痛今日
之國勢十五年於陵夷西南之黨論兮日興
念不及於邊陲鐵馬突兮乘虛未三日而王
畿水口門之翠華南漢城兮勢危元戎竄
兮謀臣和慘國事之日非他日天朝之問

罪不知操筆者兮何辭

詩

次家兄韻

耘田彭澤是聳袂彥倫非驛路馳烟者何如帶
月歸

原韻

東川公

莫道人邪正休論事是非溪花開滿樹笑向
山中歸

次贈茶山睦大欽

京洛共傾蓋江湖或汎舟天高秋日暮安得道

遙遊

水雲亭三首

流水自深淺閒雲時有無會心爲至樂名利謾區區

鑿翠天疑近憑虛地若無曉月飛樹裏秋河隔名區

白雲堦下宿絳水塵心無亭豁主人手天慳贈別區

次家兄雲字韻

願爲天下士不作送窮文得喪心無較閒觀出

出雲

次琴克成是諸臘梅韻

歲晏憐松竹任他凍雪封爭如梅吐萼冬日獨
春叢

次韻呈家兄

至樂草堂在疑文共細論海邦驚落鴈離思亂
如旂

原韻

白髮爲時累青樽致物論老成宜醉卧不必
擁熊旂

夜讀心箴有感

洞澈宵如海靈臺路不迷歛襟須靜坐窓月下
山西

詠松

扶疎含晚翠霜雪不能侵無與同其操誰知歲
暮心

安弦上京口占贈別

屠龍雖末期司馬爾優為軟綠清和節新榮煥
一時

拓窓對老人峯

端拱宛如揖其人鍾地靈蒼然應不老無語立
亭亭

清涼山口占

聞說靈芝馥山濶日影遲金丹歲已暮採採為
誰思

白雲洞敬次慎齋周先生韻

吾道南來後竹溪濶且長仰思真樂意千載有
遺光

仙槎鈴齋見舍兄書拈韻述懷

言笑共怡怡晝宵承訓辭海山成遠別懷緒細

如絲

春夜偶吟

鶻啼每月夜遠客倍添懷萬樹鄉山碧歸時與
爾偕

過圃隱鄭先生遺墟曠然有感

路經松岳下停馬到螭頭瞻仰摩挲久遺風百
世流

登小白山

碧樹千層帳白雲萬疊屏仙靈嫌我俗不欲露
真形

謹次五峯李相公好閔碧荷亭韻

沼鴈自浮沉石龜便怪奇
簾疎春晝永癯鶴睡花枝

挽金季晦

昔抱屠龍志今為駕鶴仙
風儀何處得不覺淚潛然

挽權行甫景行

惟吾直諒友相見好懷開
子奉專城養孫彌出衆材勤
斯黃卷訓命矣白駒催他日
龍城路誰家馬首回

挽金元伯首善室內真城李氏

人道嚴君在閨門訓子勤懷珠儒席上鳴珮禁
城春多慶由行善高年驗至仁一朝駉驪去西
母與為隣

望海亭賞軟綠行酒贈宋順之民古

一生傾慕姓名香坐到黃昏累十觴亭上騁懷
天地窄數聲叫鴈下山陽

壬申十月七日曉發至春川二江合流
處追次壬戌過此時五言巨語韻

泓渟大壑深中有遊魚巨俯羨無能為空思結

綱語

我曾觀海人此水難爲巨物理固當然緬懷鄒

聖語

控扼二江流春州爲邑巨如何鍾地靈竟是齊

東語

江流深復深千里來源巨搖裔白鷗雙鷺飛丹

子語

風急怕舟行灘鳴妨石巨日斜競渡人隔水呼

相語

和朴仲植檜茂林庄梅花詩

親朋難會合急節已遷移緣我玉繩對思君瓊

樹枝影踈霜月夜香發雪風時此際主人詠可

觀刪後詩

玉繩星名杜詩陶軒思玉繩謂坐對玉繩之明而思其友劉白華也

寒梅開粉艷相對百憂移節苦淩霜榦光凝得

月枝乾坤皆閉日雨露不濡時律外春容早餘

芳供作詩

多君丘壑愛且與世推移架上書編什窓前梅

樹枝水成涇淺處雲自去來時收拾無窮趣名

亭臥賦詩

次宋珍山子涇

光心韻

西林來數月腸肚始離蔬獨樂慚君實竒文讓
子虛自憐爲一蠹惟喜得雙魚中有天成韻相
酬我不如

送閔景愚希顏赴任海美

不擇西湖尉知君仕爲貧朝廷難補袞州縣欲
仁民五馬飛雲外雙鳬指海濱陶分相慰處兩
地月明辰

次安詩四韻

秋日今宵冷杯行轉覺溫離憂方可寫此樂不
宜諼豪竹等難得村歌豈厭煩一堂相接膝忘

却醉昏昏

挽再從侄掌令敦復

叔侄同聲喜金蘭未擬論佩符相誠飭居洛共
寒溫強健君先逝衰羸我獨存他年海上路忍
過仁良村

挽南仁瑞鵲慶

廿載相從樂知心少似君晨昏同坐榻花柳共
芳樽一別相思月重泉已隔雲山陽今夜笛腸
斷不堪聞

萬曆甲辰晦齋李先生辨誣䟽行時與

疏首金公允安李汝翁徽音金逢吉止

善朴季直樅茂李中立蔣李師聖歲同

畱泮邸久旅中不禁愁抱因拈韻聯句

述懷性之疏首丈表德

萬里登長路天時屬祝融汝翁懷芹草莽士性之瀝

血蓬萊宮師聖自是明心跡甫潤元非辨異同羣疑

渙冰釋中立白日轉青空師聖

來時同作客題柱洛陽橋中立旅館一杯酒師聖故

園千里遙汝翁孤燈微夜雨性之霏雪亂風朝甫潤去

佳均霑臆悽然坐碧宵逢吉

次舍兄寄詩

永夜披黃卷
留燈對聖賢
西湖流日月
東海杳雲烟
會面時因夢
傳書或借便
何當同醉席
抽韻和瓊篇

挽吳景虛

汝撥

才是南中傑
文非用缺知
三場蓮桂籍
五邑吏民思
六十惟天命
螟蛉即已兒
想應昇碧落
驂鶴在瑤池

挽權子止

黠

孝爲百行源
吾友乃能之
紿賊千兵逼
脫親萬

死危積慶三男俊遐齡七十奇君歸不須哭永
世令名垂

挽金溪巖岭

大材擢杞楠重望傾朝簪聖主將加膝諫官不
入心棲遲山壑美擺脫世紛侵存没人皆仰清
風百代欽

挽成濟州

安義

有美瑚璉器宜古不宜今天篤純其嘏人誰用
作霖五男一折桂百里四鳴琴宿契今寥落題
詞涕滿襟

挽人

志立成名早才多從政宜專城喜色動攀檻法
言危旅榻黃梁夢新阡白鳥飛情乖漬酒送自
歎病支離

次韓文公人日城南登高韻贈宋珍山

吾友菴菴翁學老琴絃弄李白已知春蘓仙詎
忍凍草堂賦人日造化流妙用籍湜走且僵見
若陪與從白雪飛青天此曲無人共知我有恟
膽日月光來送顧余醜下體子何爲采葑銜戢
已銘骨又喜清談縱風儀何戍削牒訴慚空偃

莫辭杯中綠相逢意珍重

用東坡次淵明九日閒居韻

西林濱海地犯笑滯吾生

西林舒川別號時逢彈而來故云

四

時相代序愛此九日名返照孤城斂楓林遠出

明堦前寒菊花窗外斷鴈聲孟嘉忘落帽東坡

樂餘齡問君亦何為床頭伯雅傾

伯雅爵名容斗二升登

高雲海濶到處荷恩榮醒時短一世醉後遠百

情

屈賦道悠遠而世短陶詩重傷百懷遠

寧知蘇瀨濱千里獨觀

成

子由謫雷州詩我獨何為觀成于窓○雷人以十月為臘祭作樂三日故云觀成也

送金子綏益禧赴鳳山

海西列雄州鳳山最佳麗賦出居十九民家萬
戶計卽今亂離餘完城亦凋瘵四面當要衝責
應生積弊自非出衆材緩急治難制簡命在於
公公來拜 王陞重任屬時望霜臺曾獻替攬
轡思裕民慈詳召杜繼西人得賢侯加手望字
惠仁聲兼威風未至懾奸細合浦明珠還連州
鍾乳再公門無停客幾擁文侯篲務屏時灑翰
字畫劒戟銳一心澹無營百里治功大丈夫澤
民志一分施此際人生有老少同調在心契憐
我忘頭白倉官久逐隊每深鄉黨敬餽遺傾庖

宰辱君親遇勤感激牢銘佩相從未盡歡去畱
將分袂朔風樹枝鳴寒城雪景霽五馬翻碧蹄
雙鳥指海裔脉脉未能別朝陽改軒砌無論惜
解攜賢路今不閉 聖主擢循良安得久畱滯

次杜草堂憶昔行

眼余學古訓志大常嗟嗟庶幾有餘力從政免
斗筭直已從所好不須煩解嘲青雲始得路時
事觀象爻竊慕祖士雅樂聞鷄繆繆恥爲未同
言諂笑而相交寡過猶未能况望分封茅稜契
計已非終與噲等清堂堂趙孟家朱門未曾敲

靈臺風雨夜擇地定立旂時俗排異已拂耳聲
呶呶甕間蛟起滅關中虎咆哮不如早歸田寧
論地肥磽柴門卽金馬柔蔬是嘉肴沽酒無谷
巷弋飛有弓朔家居無別離安得懷懽恣邦家
屬艱危念難增心恢孤城大計失險阻難恃崿
江邊受降壇高低十里郊一屈不可伸何人知
悔教杜門老無爲古方病來拋愁緒風中雪浮
生水上泡埃時將拔亂 聖量荒穢包東隅雖
已失可收桑榆梢雪恥用憑河赫業如竹苞

次杜草堂水宿遣興二十韻

壯心成獲落衰境漸昏迷脚軟惟須杖頭童不
用篋龍鍾元脫畧蹤跡豈塵泥賞月梅移砌迎
風柳護堤治生常澹泊亂世又東西學退從兒
懶年登任婦啼艱辛謀飯糗腸肚習羹藜樓迥
悲登楚絃工笑立齊彤庭朝對策青鎖畫催鞞
聲遠衝天鶴飛高劈水鷺天門同互市雲路乏
相攜有用皆良驥無才是監鷄門闌多附勢桃
李自成谿王國身曾許君民志已齊循名時論
峻逐隊冷官低客恨暮年劇幽期巖穴棲高峯
尋石逕絕澗上雲梯世故元無定吾生卽有倪

風寒肥似割筆凍句難題浩蕩春波綠何時釣
玉溪

自鳳陽抵杭谷阻水三日聞 大行大

王五月初八日賓天越六日辛未 新

上卽祚哀情逢吉語還家後次杜草堂

北征詩七十韻示諸兒

久客鳳陽村還鄉問蔡吉洛江小如帶時旱利故云利

涉攜盡室行行到杭谷五月十五日山岷仰畚

田一村門皆草飛雷忽在目無時火雲出溪喧

窮岫雨前進計已失隣翁說沙川憑河戒慎勿

農人護畝所憂災近切客行還蹉跎歸心生
恍惚俄聞西來報南宮召芮華桃越設重重大
夷陳瑟瑟忍見玉衣舉臣鄰皆泣血九齡夢不
驗佑德天理滅過密八路音奔走深山窟旅臣
哭失聲遑念水蕩涵攀髯嗟莫及不覺五內裂
唯我 大行王應天監前轍指揮率土安盪滌
遠近悅頽綱一朝肅奸慝千缺栗髦士喜拔茅
何人憂沐綦羣工紛戮力經邦務本實言路四
門開無論謀巧拙往者慶運宮幽閉塵埋沒凶
徒擅國是已極廢主末逢君八左腹狡兔三窟

穴豈無正論人誰復貴駿骨患失計還愚何能
慮始卒西郊將士迎真人出庶物敘倫在除殘
謀臣亦黃髮反正天手假纘緒人心結怡怡奉
大妃舉國歡聲囀俄頃人紀張塵紛正洗雪
宗功分茅土甲卒饋巾襪盛烈兼前代任賢若
加膝疲氓墜缺極至治類枝折美璞有雕工旨
酒無睨褐臣庶祝遐年欽均就堯日慈母保赤
子使民誰戰慄孰謂顧命傳羣公應門列追思
南漢日雨沐又風櫛故國八望低愁烟橫一抹
賊勢驕憑凌廟筭何迂濶勤王南北軍晨夕望

飢渴義師聲寂寥虜情多恐喝相持一和字衆
難八耳聒難將當時事復從今日說偷生者臣
鄰殊死無勇卒誰能一戰勝却使虜氛豁臨亂
憶真卿助順思回鶻刷恥須仗義救火由曲突
在庭文武臣畏劫固無匹八虎畏其穴牽羊議
已決以虜遺君父出城何太疾一屈不可伸賊
氣終難奪主和甘賣國眼釘何時拔曾連倘再
生却秦易蒙發江邊千古恥突兀鐫石碣想應
新陟王奸臣悔不殺嗣王誠孝篤勸進退
卿月親喪固自盡裒經情號絕爾曹侍病母千

里隔禁闥旅程舊郎官奔哭禮亦闕我今徒西
望至情還乖缺默傷垂老魂不寐朝已達

次梅字韻

人愛菊花君愛梅山亭溪處爲移栽豈徒貞節
凌霜雪且要清香月影來

傷時作

弘羊掊克筭舟車罪極殃民死有餘那意聖時
猶不戒錙銖爭利國將虛

姑蘇臺

辛苦三年聚楚材姑蘇百里見層臺豈知麋鹿

來遊處野火空原但荻灰

舒川郡齋獨酌無聊奉呈伯兄以道相

思之情

獨坐西林地盡頭月明窗外鴈聲秋別腸有似
車輪轉一日中間一萬周

世事如今合掉頭一春蹉過又三秋千里故山
歸路遠羽翰安得借周周

鈴齋偶吟

半規西日到天邊風景迷茫薄暮烟八水餘光
翻石壁穿雲殘照掛山顛

風前秋葉飽霜紅
雨後雲歸又北東
章罷筆飛
模勝景無端鸞鳳下青空

玄冥搖幟黑風多半夜
乾坤滿雪花醉裏興來
開遠目白屏之白倍嵯峨

擺掉滄溟出海東
徘徊徐轉碧空中
中宵冷濕
螢流草半夜光凝鶴睡松

有感

好還天道正如符
向背人情謾自愚
今夜細聞
居士說能令遊子起長吁

集句

玉壺何必繫青絲醉倒青山欲暮時家兄共指斜

陽不相貸已席中離思少人知琴克成

春夜寫懷集古人句

明月斷魂清靄靄蟾霄分獨坐到天明李老逢

佳景惟惆悵元稹別有千愁萬恨生白居易

惜花集句

杏艷桃嬌棄晚霞唐彦謙花時比屋事豪奢陶墀

一盞悲春酒韓偓纔見開花又落花陶雍

次黃景輝養心堂諸詠

巖邊春雨夜來經巖面千花一樣明不管人間

多少事惟聞啼鳥報新晴

右並巖春花

枯旱方愁灌溉通甘霖一夕下長空坐見前郊
禾滿畝抽青浮絳轉頭中

右礪郊夏雨

人憐栽菊傲風霜公愛天然豔豔芳好向東籬
開滿砌何須葵藿但傾陽

右東籬秋菊

人愁凍雪滿平疇公喜前山霽色浮不怕朝陽
生眼纈閒吟模寫染尖頭

右冶山凍雪

哦詩何必效陂眉宗岸松濤聽亦奇浙瀝枕邊
聲勢壯潛思屈子自沈時

右宗岸松濤

何用畱侯借箸前田家興味在秋天渾忘世上

繁華事白酒金鷄年又年

右南畝稻香

次權子守韻

久病驚看月色完三夏夜氣透窓寒
桐君有藥投何益竹祖無功寢不安
只欲池邊扶杖過無心床上展書看
此時賴有瓊琚贈一曲陽春和亦難

挽金忠窩孝仲

疾病沉綿近十霜悲纏朝野哲人亡
登科五子傳家慶位長三司振國綱
二品生涯清一字百年交契淚千行
佳城卜得靈真地福澤吾知滾

滾長

挽安察訪崇儉

少學詩書晚學仙
愛山深八種山田
人間富貴知非分
物外烟霞樂有緣
風潤五芝貧自若
日長三逕趣悠然
可憐人去山空翠
身後惟餘泣鬼篇

挽金伯溫

璵

少日才華世莫當
文成翻水擅詞場
驂騑市上人皆顧
鵲鳩秋時草不芳
天意佑仁眉壽極
國恩優老職名揚
二難趾美諸孫秀
還謝塵寰在

帝傍

挽秦正郎毅伯尚弘

吾友秦君才且賢
文辭海濶色蒼然
京華旅食同憂樂
鄉社從遊共後先
三品官街寧滿德
九旬眉壽但能天
佳城遠卜春陽縣
蘆嶺干雲我涕漣

挽權通禮斗文

稟質淳淳見本然
一生豐稌受于天
官居五馬二千石
壽作三朋八十年
門外連綿蓮桂慶
世間稱道子孫賢
古來得福如公少
此去應追鶴

上仙

挽宋僉知榮發

陶白生涯萬事宜
千名春酒醉多時
溪前銀鯽飛霜膾
秋後香粳浙玉炊
處世人稱爲長德
享年天與得期頤
掌珠莫恨先公棄
膝下孫男箇箇奇

挽李而幹成杞

系出陶瀛綿本支
吾兄特秀好風儀
高談有脊人誰厭
美質無疵我所奇
青眼相從無限樂
白頭永別不勝悲
承家賴有詩書子
餘慶行看福

履綏

自英陽入寧府道中聯句

連霄同枕又同行
栗不覺悠悠百里程
潤早渡石砮穿柳曲重遲
驅羸馬踏霜坳
栗吟鞭在手江山困潤古劍開心
富貴輕重半石畚田牛不用潤連雲峻坂鬼難平
重層冰耀日龍鱗動栗危棧懸空虎骨橫
潤剡木引渠形屈曲栗緣崖負龕勢崢嶸
潤商人載路輪蹄疊栗獵客鳴弦虎豹惇潤鳥獸多形名不識
重英雄無跡事難評栗身窮尚有江湖志
重志大寧論趙孟榮栗

當道世人皆目食潤樂天寒士獨躬耕重憂時
白髮三千丈潤處世浮生四十齡重蒼水院中
同歇馬汝山道上各分程栗知心伊昔思南北
開抱如今卽弟兄栗

白雪歌送權宅甫赴關東幕

不周風來百草折漢陽十月卽飛雪風頭如刀
水作冰城上寒雲萬里凝貂裘不煖旅遊苦此
時君向關東道關東佐幕任爲重爲擇卽官君
拜命蒼生苦樂係缺分駟騎催行碧蹄翻想君
偷閒遊金剛萬二千峯休玉堂天下大觀此爲

長安集卷之
最到處新篇綺繡揭男兒壯遊亦快意定知子
長畏吾子自料青雲未有期明鏡看來愧白絲
寒風浚巷絕知己落葉擁壁霜逼肌青絲繫壺
爲君提酒行未醉聞暮鷄崇仁門外與君別別
時脉脉情難語明朝思君君不見空畱雪上馬
行處

憶昔行逸

疏

豐基郡守時請救民弊疏

伏以天下之事因其未弊而補之則庸夫易爲

力至於已弊而起之則智者難爲功蓋席完具
之勢而修頽墮之政者只勤一守令之力而猶
可責效於指顧之間若守虛棄之地而收敗圯
之勢者決非邑宰之所可爲而必待於 恩典
之特施也臣一介腐儒迂拙無用濫叨郡寄責
重蘇殘豈不欲殫精竭慮小補分憂之重乎顧
以材劣識淺施措失宜三載居官一能未著上
以負委任之 意下以孤羣生之望受人牛牟
立以視死此臣之所大恥也臣目擊懷慘思欲
陳奏者有年矣而寒賤踈逖不敢以一守令之

微仰達於九天之下每一念及付之坐嘯今臣
適承差上来得近闕下微臣前日所願陳而
不可得者可朝奏於丹宸而夕澤於蒼生也
則位卑言賤之嫌將不暇顧矣臣謹按豐基爲
郡嶺底殘邑也前監司臣金時讓以已成棄邑
爲啓則郡之敗圯固已久矣鮮少人民寓居於
荒茅亂石之間剝樹代瓦編茅爲壁而土地磽
确水旱所先年登而半菽不繼遇歉則拾橡爲
命民之爲生苦矣而嶺左需應輻輳於竹嶺之
下疲氓供役生事日繁急時索賦逐日出力一

家而支十戶之役單丁而當百夫之任民之爲
役繁矣其傷財病民難以收拾者不可毛舉而
積弊因循不得不祛者其大有三請陳如左其
一曰陳久還上之弊本郡各穀元數五千五百
九十石有零而皆雜稊稗逋欠居半責償無憑
徒爲虛簿名雖爲郡反不逮中人之產誠可憐
悶聖上臨御之後宣諭御史及監司臣閱聖
徵洞見本郡空簿之穀皆由於絕戶流亡之久
遠月課調度場粃米之名亦創於鄭造朴安道
之賊手具由啓聞得蒙盪滌其數一千九百十

八石有零也亂離餘民歡忻鼓舞皆有樂生之心乙丑之秋戶曹還錄其數責出於流公正所謂皮之不存毛將安傳者也臣伏見郡之殷豐順興二縣地僻而人稀臣常往來而詳察之則依山村店或數十里而僅有一二如溪林鳥獫見人驚駭者小拂其心則捲而之他由是逋欠之數此二縣居多焉若又徵出其盪滌之數於不遺之民則將無一民之安居而永爲空虛之地矣臣於去歲謹抄無憑可捧之數移報於監司臣金時讓金時讓轉爲狀啓而戶曹只減場

稅米二十六石十斗而已豐民之蘇息無期而
守土如臣又未知計出何地也 聖上誠能俯
察御史之盪滌金時讓之狀啓衆以臣疏盡蠲
前所盪滌而還錄者使民得免移徵之患則德
澤洋溢八人至浚豐雖瘠土彼離親戚棄墳墓
散之四方者豈無還集舊居而終爲樂土也哉
議者以爲錢穀不宜輕易盪滌使國計日縮臣
曾忝爲地曹郎官亦爲此論到今易地不覺瞿
然傳曰有德此有人有人此有土有土此有財
有財此有用財用之足實由於有人與其徒愛

空簿而終無子遺之民孰若湯滌逋負還集流
氓而大開有財之路乎其二曰勒定下中之弊
本郡田畝元數一千七百六十六結七十四負
而厥土白壤皆不粘膩方夏水冷未秋先霜竹
嶺風穴災沴之源禾稼損傷所穫不實播種一
斗而收得一斛則頌稱中年雖殫其地之出竭
其廬之八猶不足於供惟貞之賦蓋其風土然
也徃在昏朝賊臣姜璘爲敬差官勒定下中其
數至於一千六百二十四結四十五負而下下
則只一百四十二結二十八負三束矣夫在沃

饒之地下中之出例不過十之二三而璘之下
中於豐基者多至於十分之九至今豐民寬勸
八骨欲食其肉矣安東之民亦被姜璘下中之
害而守臣閔聖徵上章陳達得蒙蠲減之恩
皆出下下之稅安東之民頌 聖上之德稱聖
徵之功愈久而不衰矣臣竊念豐基之民亦
聖上之民也 聖上一視同仁之心豈間於安
東之民哉只以聖徵血誠弼中出言有章故
聖上採其䟽地部從其請也臣以賤品無路叫
闕微忱不達於上惠澤不及於民此臣之所以

素餐臨民顏厚有忸怩者也然而隨時損益聖王之政而有懷必達臣子之職也臣若委之於無可奈何而不爲陳達則此政商臣所謂有厥咎者也其三曰獨當刷馬之弊東萊一府嶺南之咽喉也倭人接待之事進獻上物之運悉責於府民故是府之田稅貢物盡爲蠲除者以其歸輸之地賦役之繁不與他邑等也由東萊而輸致京城也例分三路而其二路則右以達于聞慶而踰烏嶺焉左以達于豐基而踰竹嶺焉夫二嶺下之二邑實上道要衝也歲貢之倭物

監兵營及界首官之進上列邑均輸而及至二邑獨當列邑之所輸故於聞慶則田稅之外凡諸貢物一切蠲減聞慶之民惟知刷馬之責出使星之接待而無他貢賦也豐基之與聞慶刷馬之輸運同一獨當也使星之迎送同一接待也人民之多寡不相遠也地方之大小亦相敵也烏竹兩嶺其險一也而獨於豐基貢物無所減凡十四司一年應入需用之綿布多至一千一百四十餘匹則豐民之抱冤不已憐乎嗚呼三弊不除則無以爲邑是猶養魚於沸鼎棲

鳥於焚林雖慈父不能保其子守令安得以有
其民乎伏願斷自宸衷下詢該司天筭廟
議商略無遺陳久還上更許盪滌下中勤定亦
皆蠲免克盡懷綏之方得遂蘇息之望又降
旨于本道監司詳察刷馬之弊一依聞慶之例
使民役得均而莫厥攸居則尤不勝萬幸若謂
臣地賤言輕不必一一聽從則臣亦何心竊五
斗之粟名一邑之長徒守空虛之地而爲無賴
之不托哉臣不計踈遠冒陳狂瞽罪當萬死而
愛君憂國之心人所同得敢陳一郡之積弊冀

蒙四聰之垂察伏惟一殿下憐其愚戇恕其
僭越臣不勝隕切屏營之至

書

上尹方伯暄○爲龜澹儒生作

伏以璞不自琢玉人琢之士不自養君子養之
盒璞雖美擲之則瓦礫士雖才棄之則管蒯然
則琢而珪璋之玉人之任也養而絲麻之君子
之責也生等竊慕黨庠古制謀建數架學舍以
便講習背山臨流林壑邃美是爲龜澹書堂顧
抱經肄業之徒八門趨且未獲棲息者以供億

之無其人也蓋生等力所可任者畧已成之至於樵蘇之任并曰之役非家辦戶出之能給也然則因其已成振其自新使束枯有夫浙玉有嫠者閤下事也方今撞獄大盜金木其項伏罪夾斧明示常刑其妻若子必將減死論爲鬼薪沒八公隸矣閤下誠能馳一號令指出若干名永屬於書堂則閤下獎飾儒學之功殆將淺九淵而輕九鼎矣生等草茅遐賤未諳公體意謂此事主管專在討捕逕先呈書控悉與懇及見討捕移關則分屬之舉果非討捕所職也閤下

宣化一道民物皆春威德所暢士服明介養才
爲急文教宜崇而扶護之方亦有緩急彼完久
學宮既有典僕鳬鴈來去不爲多少而惟此龜
灣事皆草創一丁得失多士聚散伏願閣下俯
察輿情許屬男女永爲奴婢以爲養育羣才之
助則將見文揮月毫劍淬霜鏑小以成小大以
成大眇若獨蛹之抽堅似羣金之撞嶽力轟雷
可繼蜀雄之李杜寒色拔冢誰非唐士之張孟
閣下一紙宣力美談千年生等今日傳經金龜
百世豈不休哉生等嘗聞古乘致力儒宮不一

其人而終古以來獨稱文翁者以其割去文具
用盡誠心振起新民培植儒化也吾黨之士其
於自新烏敢望乎只冀閣下以文翁之誠而振
作之耳生等非以討捕移關爲有力於閣下關
聽而敢此並呈者亦欲問下知生等興學之誠
無處不眷眷也

狀

冬至呈巡相狀

一陽初動歲將窮於灰飛萬室皆春化已行於
草坼吉慶伊始贊頌固宜敬惟斗南一人江東

獨步太公兵法潛銷碧海之鹿吉甫文風喚起
青襟之抃屬茲令辰之至茂膺遐福之休伏念
老而無能笑矣初計蒼顏白髮自憐秋柳之衰
荒詞短章庶續甘棠之詠

呈統相狀

六管灰飛微陽動於牛子三道威振軍令嚴於
五申吉慶自来贊頌曷已竊惟山西豪俊冀北
聲名氣增艱危是謂無雙國士材兼文武可辦
不世奇功壯萬里之長城慶一陽之令節伏念
無功可記食祿即多一雷臨民未展趨拜之禮

三尺奉牘只效瞻戀之誠

呈兵使狀

歲竊北陸見一陽之初回威振西湖知萬率之
咸服吉慶之至贊頌其宜竊惟方叔壯猷子房
奇策韓門虎戟大丈夫之威儀心上龍韜真將
軍之事業積弊自祛於革舊羣情胥悅於鼎新
伏念百里雷封一官湖右情馳細柳瞻望亞夫
之營跡滯南城慚愧檀子之守

序

送李容伯崇彦赴祥原序

我國道分爲八關西其一州郡之雄富人物之繁華甲於一國諺稱欲作邑宰必踰沙峴者以此也壬辰之後屢經大亂所謂雄州鉅邑惟日凋瘵况祥原介在山谷物力未及大邑之十一而且弊於武夫之手者哉朝廷方以得人爲憂歲乙酉刑部郎中李公出宰茲郡將行語余曰在家同鄉還朝同井相從之樂雖斷金投漆未足爲喻也今當解攜宜一語以相規余應之曰噫有是言乎金璞出礦應用皆周李君之賢我知之矣銀鉤灑翰文本於質李君之才我知之

矣道行於朝廷則舉國受其賜惠專於一邑則
蒼生安其業官有內外而致澤則一也牛刀割
鷄綽有餘裕余何規焉合浦珠還連州乳再彼
珠與乳非有情之物而昔無而今有前盡而後
復病焉則殆感焉則誠民情大可見也君今下
車民手加額一令朝下百廢夕興又何規郡地
水泉例多鐵色飲爲病胎自昔皆然吏于茲土
者咸以是患焉殊不知體有大小養其大體則
小者不足爲患矣昔吳隱之雖飲貪泉終不易
心不待夷齊而泉名易廉李君之去必先澄一

心使土石蒙烈馴致活水上出而滓穢消除靈
液八口而丹丘其身千載之下有二隱之矣又
何規然子不以老夫爲無可取求規於余余請
以平日居官常欲寡過而未能者爲子言之酒
爲合歡而過飲則有失色雖難遠而過近則招
累刑是補治而過猛則怨起政貴仁恕而過柔
則民慢凡此四者老夫未能一焉躬不逮而欲
勉人難矣雖然螭螟不能越堦序而良驥一日
行千里之道蛙蛭不能離尺澤而輕舟一瞬破
萬里之浪凡事之能與不能皆在人力量如何

耳李君勉之哉李君笑而不答於是送行之人咸知李君之之任政化果能有成也

巨樹洞約案序

余居散一日邊子潤袖其洞約一冊來示余曰子居吾洞久於吾洞大小事所耳目者慣可序弁冊首茲以序屬之子余曰洞之有約而識之古也未聞洞約之有序也子潤曰吾洞也姓有同異而均是暮功之親住分陵阿而同在區域之內內有媿睦之誼外無數疎之嫌洞會之設雖倣於人親親之義愈篤於中然而後之親盡

則情盡情盡則塗人者勢也幸其未至於塗人而使之因會而敦叙焉此吾一洞之心也心之所同然者宜書之於冊使一洞之人存之於目存之於目則其銘之於心也固由此觀之序亦不爲無助余起而言曰善如子之言也夫萬物本乎天人本乎祖自葉之根由源及派雖有同族異姓之分其初一人之身也生而同鄉者爲幸居而同里者爲尤幸環一里之內曰兄曰弟若叔若侄情意切摯人莫能間迨其講會出門同人則左右前後無非親族愁去劇箭歡來湧

泉新貫多而言折昔壅無而抱攄兩人同心雙
繭作絰以之勸德蔡而規過失則其相從之好
相益之多雖拾纖芥於靈珀銷宿憊於神藥未
足喻其樂也至樂之中條約兼備曰洞會之設
而展親親之意行燕毛之禮而盡敬長之道則
親親仁也敬長義也苟能心德無私斷制得宜
則舉而措之何所不可父兄之教必以是子弟
之承亦以是交相飭勉勿替以世則巨樹一域
將永爲君子之坊矣視世之宰牛呼牟函珍極
烹欣共漱於酒醪強歡笑而咿喔視禮義爲弁

髦惟纖捧之是耽者不亦遠乎若其節目之細
米布之需賞罰之當議論之平尺有寸可度秤
有星可稱諸君子盍相與講究之子潤曰諾於
是乎書

義穀序

吾先君以獨子自寧鄉遷于榮因家焉今姓子
孫爲男者二十有餘人意者先君之餘慶其將
有後於來今矣其親親之義敦睦之風不可不
熟講以爲世守之規者在享祀之必誠講會之
以時以庶幾吾家聲之不墜也而世苦清寒財

力殫公所以寓誠信之具者掃如傷哉傷哉嘗
觀古人立祭田義田以篤追遠之誠以厚同宗
之親此君子之有深愛而保其族爲後世有家
者法程也今世罕得見此等人雖百一而有之
慕悅而從之者無其人馴致俗尚之日渝盡誠
於其祖先者鮮矣則何暇於睦族乎由是曰兄
曰弟曰叔曰侄而其情則路人也况切盡而總
總盡而親盡者乎余爲此懼圖所以自拔於流
俗者則莫若義穀之先設以爲祭田義田之根
本自吾兄弟子侄而爲始其已娶者各出租斗

有差限以八寸以爲後日親盡於先君者或置
田以圖不遷之祀焉必有子孫之誠孝者其將
有感於斯矣時 崇禎四年辛未月日也

墓誌

祖妣朱淑人墓誌

我祖母朱氏系出熊川高麗太師文翼之後祖
諱善林典籍考諱幸司直旣筭歸于我祖考正
郎府君寔生我先考 贈都承旨府君祖母生
于 正德戊寅卒于 萬曆戊午享年百有一
歲一時名公鉅卿爲作絳玉杖歌以美之祖母

蚤寡以遷教爲重徙居榮川因家焉故不得紆
寧海輿峴祖考墓卜葬于郡東省知洞南向之
原祖母性謹嚴訓子有法不惟文藝是勉尤以
持身謹行爲戒遇物設譬因事爲教凡我子孫
之不失爲儒家者皆我祖母遺訓也 崇禎三
年二月日孫琿謹誌

祭文

龍堂祈雨文 在舒川時

西林爲郡大海之傍靈驗所稱曰惟龍堂神物
是宅噓氣雲興雨以潤之莫非爾能有禱輒應

自古在昔屬茲民因旱魃爲虐大野若焦耕者
束手不蒔何賴滌滌田畝間或播植土脉不黏
秧針出地旋夭旬尖大命近止庶民奔走陰石
徒鞭泥牛莫效瞻仰昊天救死不暇顧余無狀
吏于茲土蔑德及民丁此大灾立而視死尚忍
爲哉仰惟龍公潛在九淵驅電搖幟是神之權
千里沛然萬姓其蘇尚慳至澤厥愆在吾今我
聖上視民若己畏天減膳敬至誠至遇灾修
省實爲黎烝職此分憂敢有不承割髮及膚剪
爪侵肌靡愛斯牲稽首陳辭靈其顧余惠寧一

方仰山之謝吾何敢忘

祭外祖考三松堂南先生文

維萬曆三十六年戊申二月戊午朔二十一日
戊寅外孫宣務郎行成均館學正朴琨敢昭告
于外祖考成均進士南府君嗚呼哀哉昔我初
生未離襁褓育于外家是拊是顧纔有知覺日
承訓誘問綦趨庭不就外傳居宿于側以晝繼
夜每於昧爽警我昏惰奉以周旋不敢失時就
省之餘夜被提撕日往月來率時爲常置我于
懷嘉我不忘曰昔先正司馬溫公不遑自逸事

君盡忠其八相府坐而待曙進止之期必有常
處吏胥識之不失尺寸故其設施事業免爛後
生進步古賢是憲大訓八耳益勵初心歲在辛
卯逐隊儒林誘掖獎勸一視諸生雖無異聞因
違奔程凡厥布置興學之方乃考勤慢定其程
章一出至誠靡不警策幸啓旨龍聾孰非恩澤而
今綿邈難記萬一若其日用行事之跡耳目所
及猶可彷彿友于之情老而彌敦塤唱箎和人
無間言睦恤之義本於六行甌石之得必分鄰
並若敬見善按湯疾惡聞風勸懼幾人薰德其

爲文章自成一家不待師承透徹五車文出月
脇詩聳山骨天衢甚濶跬步可達射斗龍光肉
眼不識獻御和璧玉尹謂石易老馮唐不第韓
愈大志未展惟正順守恥向京華幕隨朝叩詩
酒自娛不易其節幽憤日積雲霓糾結世間是
非人事變易或得或失可喜可愕寓諸筆舌得
以舒洩倚馬萬言鶻翮千尺枕麴一味鯨海百
丈多年鬱抑一醉成病龜蒙潭月遽碎秋天奉
樞北來淚徹重泉嗟惟此時寇盜充斥于以權
厝先瑩之側罔極之痛愈久愈深况茲山原淤

泥所侵前面歌傾因雨崩夷霜露愴懷雲物悽
其幸我表叔誠孝之篤改卜宅兆竭其心力蒼
崖壁立流水沄沄稽禮遷窆墓成孔安我適滯
京縻以小官隔遠千里雖未奔哭永慕一念敢
忘頃刻追懷往事感愧交極今方仲春百五令
節諏日伐茅修葺塋域新阡落日觸物興哀號
天不聞肝膽欲摧嗚呼哀哉風樹不止薤露易
晞欲孝無地昔人所悲抱茲忱誠何處可展潔
爾蘋藻菲薄斯薦俯伏陳辭以冀明歆泮泮如
在庶諒我心嗚呼哀哉

祭裴判官益哉文

嗚呼哀哉兄之文詞閎中而肆外俯拾科第兮
如地芥才非不優而不汲汲於就仕辟書踵門
兮良其趾事親日短兮爲養而一屈南州之尉
兮奚擇五馬行色兮踟躇乎驪江之潯吁嗟二
豎之侵憂思望雲兮千里病日深兮終不起輒
車駕兮路出兩龜之間故宅咫尺兮胡爲乎伊
山嗚呼哀哉兄之與書兮或一月而至再每言
病卧兮無意於人世謂兄安於家食而不肯趨
朝茲故移疾而解嘲孰意長途之未騁而大限

之寤輟我運斤之生風青春之遊兮白首相失
觀居此世兮非所欲濯濯燁燁之光英今也則
無昔日之自視離轂望君飛鴻者其已矣夫嗚
呼哀哉先壠兮其傷風殘兮向陽坎中高上兮
兄之宮是營奈何乎兄惟翠竹碧梧之鸞鵲停
峙者能繼兄之志兄爲不死

祭吳敬庵景虛文

惟靈秀朗異相稱自懷滿貌鑑溢匣眸光發矧
文詞夙成若翻水然三場科第摘髭妙年鶚立
諫院長官氣威肯作雲鵲聞呼向急衆皆逐利

爲所不爲公獨在泥沙白不淄人或云云未知
公心行事可觀夫豈直尋治郡有聲乃公餘事
方物發慮迫出等類謂公大器位備其德天何
不憖而有斯疾隆棟忽摧嶺外無人如我無似
早追後塵意鍾老柏信旌白水吹埧吹簫伯氏
仲氏先君之碣雄筆千古欲報公功愧我庸魯
嗚呼哀哉無子勿歎有子勿喜退之曾告孟生
郊矣達人知命猶子亦子收淚奠杯再拜帷几

祭李文興門文

惟公志大而簡貌嚴而恭挺翔龍躍虎之姿氣

磨屈賈之壘抱歛鐔淬鋒之器目短曹劉之牆
長松自中於棟樑天驕允合於馳騁世無阿房
之建誰貴五丈之旗人遠瑤池之遊不取千里
之足宵中學海尚優於廣寒丹桂之攀筆下詞
源暫試於太掖青蓮之選恥翰音於天上讓雉
膏於人間一竿細柳輕烟喜遵詹何之故事三
杯高歌緩舞動思衛武之初筵宅畔新篁不受
炎天之暑氣簷前古木長畱晴日之雨聲牕玉
石於觀碁琢肝肺於繪句昔我先君白雪寡和
青眼相知雖非早歲之通家幾多一壺之同寢

其利斷金其臭如蘭鋤去陵谷而平坦於弱張
臂於猛縮爪笑他雲雨之覆翻不遇興訶俱未
得行於王國有教無類猶或可驗之一方文教
宜先冀萬一小子之隸荼里仁爲美喜二三老
成之同心闢堂壇而賁飾地與我所天與我時
薙荒茸而修治山增而高水增而廣立拜老讀
法之教揭治學明倫之方心誠乎厚俗敦風已
兩美之相合交密於吹埴投漆期百年之莫違
孰謂先君勝平日之容顏遽作顧生望初秋之
蒲柳痛矣我家之天割加以玄宅之人爭指杯

土而冒稱千不是萬不是證墓木而雄辨一則
公二則公不肖無狀得御多年飽德有日與其
進也未逢擲盃之訶從而師之欣承取履之命
只恃勿遐之厚眷猥達無隱之誠心每賀齒髮
之未衰謂齊岡陵而不老嗟白駒之過隙極星
沒於春分奄黃熊之八門綈衣陳於夏月岱止
故苑難攀子喬之驂鸞城南舊遊空餘孟生之
題竹月纔八而又日忽焉再暮之臻喪已除而
在心赧然一祭之晚追宣父之遺愛懷趙文之
餘風幽蘭已催猶覺香風之遠宿草雖在何曾

淚葉之乾

祭琴兄佑聖文

自君之歿兮行已五月每一念至曾忽忽其猶
疑今君之葬兮使我来哭豈料人世真有此事
之可悲昔我與君相知於年少之時膠投漆兮
同心至今白首之未移交道之密申之以連姻
一家之誼益敦於茲時時相訪兮互爲嘉客我
執子駒兮子勸我危潤屋之資餘波足以及人
顧我雖無甌石兮幾受子之厚遺屬余家禍之
連仍又駕姑母之靈輶子之莫兮於路庶蕃豐

潔兮情意勤斯誰謂此別之爲永訣曾一去而
莫余追以子之賢名不登於薦書而徒計升斗
於縣倉之湫畧竟屈抑而成病雖秦緩兮奚醫
孰言仁者之必壽仰視天兮無知今茲吉日兮
爲子高上坎中之宮倏忽人事兮忝一炊笑語
隨風兮入于杳冥奈何乎公兮滄漣而奠薄具
兮永歎魂有知兮聽我哀辭

祭南仁瑞文

嗚呼哀哉壽也者吾不知其何道夭也者吾不
知其何故仁而必壽顏子何夭不仁而不壽盜

跖何壽其壽其夭其理難究抑未知天之於人也元不相參而任其自生自死者歟雖或壽或夭於其間而壽者不真生夭者不真死者歟天道可必吾今有得矣生之不淑其心已死其生於世一土塊耳死而無愧其心活潑其化而盡人道之終生何好兮死何惡理之常兮晝而夜元而貞蓋嘗以是而論吾友之死則五十之年兮只加顏子之二十其死誠可哀而其真不死者可質於耳目之所及其孝也生則致其養而沒則極其哀其悵也謂弟不如已而自取老羸

如古人之爲也此吾所艷仰而知友之所傳誦
者也嗚呼聖賢千言萬語其要不過孝悌而吾
友能之吾友之死兮無愧於心子雖無愧兮故
人惜子之情則如何來奠一酌兮淚滢滢兮

祭公室淑人邊氏文

維歲己丑十月二十三日戊申夫前府使縣城
朴瑀謹以庶羞之奠告于公室淑人原城邊氏
之靈與君偕老五十五秋子孫寔繁科第或收
人世所樂此外何求我不量分白首南州君之
卧病始於此時二豎居會鍼藥難醫舟泊鳳城

載罹寒暑三江前阻故山何許舊疾載來君亦
疑難我志前定惟望生還盛暑流金淫雨滅木
夏月路上進寸退尺苦歇無常精神不昧幸而
還接不幸云逝追惟今日無乃添傷平生遺恨
銘骨難忘嗚呼哀哉君之稟性柔嘉爲德舅姑
其安間里稱睦承筐小心愛子多訓婢僕雖微
遇之亦善內助君優謀生我拙食貧多年勤苦
已極身病之來心勞之積言念及此悲懷自激
嗚呼哀哉有生必死天道之常我今耄老筋力
失強肌膚羸瘁齒髮危禿蒲柳秋零朝暮奄奄

君茲先歸體魄埋陂木枯灰冷泯然無知冥漠
九原難尋影響從遊路斷誠可長慟如其有知
魂氣來往能以精神相逢泉壤衆香十地永世
追隨斯爲奇遇其又何悲嗚呼蒙莊叩盆唐帝
等觀或歌或哀中節者鮮老夫之懷不怡中夜
心何太傷淚何盈把遠日已迫輶車將駕儀形
雖隔夢寐可見庶幾英靈歆我一奠

悔易堂集卷之二

附錄

行狀

公姓朴氏諱琨字潤甫務安人也始祖諱進昇有功麗代受邑務安因居焉仕至國學典酒自是之後簪組連綿多至將相八我朝有諱義龍實爲開國功臣典兵部書兵部三世而至宣傳官諱解當燕山朝見妻侄任士弘怙寵自恣恐禍及棄官歸是爲公五代祖高祖諱之蒙自京移居寧海府贈通訓大

夫司僕寺正曾祖諱元基成均進士祖諱全
文科正郎考諱善長文科慶尚道都事以公
原從勲 贈通政大夫承政院都承旨妣英
陽南氏進士諱夢鰲之女以萬曆丙子生公
於榮川郡花川里幼而聰悟好讀書善屬文
年二十八登癸卯式年第選補成均館學諭
轉博士例陞典籍歷司憲府監察戶曹工曹
佐郎再出禮安縣監蔚珍縣令歲丁卯拜刑
曹正郎遷戶曹兼記注官時北兵來侵至平
壤朝廷命愚伏鄭公號召嶺南而公爲從事

官戊辰由奉常僉正出豐基郡守兼編修官
丁丑拜成均司藝轉承文院判校禮賓寺正
出舒川郡守後又歷宗簿軍資兩正乙酉出
善山都護府使戊子棄歸壬辰八月初二日
以疾卒于第壽七十七葬在郡北耳山午向
之原今順興府也公資質溫良器宇端重謹
厚勤儉篤於孝友累得任字終不爲子孫長
尺寸而其於爲先之事則必盡其心力薄於
自奉而厚於周施所得俸入輒分諸兄弟之
家尤不喜華美凡所服用雖在官無異寒士

爲政一以愛民爲心戴星出入未嘗少懈此
其處心行事之大略也家居日必整衣冠與
兄處士公怡怡相對埴唱箎和母須臾離待
人接物一以誠款不修邊幅宗族稱其睦婣
鄉鄰服其忠信若遇先世忌辰則雖年迫八
耄必齋沐行事以盡如在之誠待子弟不嚴
而整常以修身謹行勿與人較及不妄語等
事惓惓爲訓公之所以自修者尤可見於此
矣配原城邊氏諱慶膺之女生萬曆庚辰年
七十先公沒葬郡南雪梅洞有五男二女長

安欽生負次安復文科佐郎次安著通德郎
次安學宣教郎次安明將仕郎女長適士人
鄭基學次適士人金宗衍安欽四男長施雨
生負次施彩施後施繪二女朴炕李珞安復
三男施益施達施祿二女成命夏崔遠基安
著三男長施春俱中生進次施夏施秋四女
權霏文科琴愼徽鄭鎬全信重安學三男長
施昌俱中生進次施衡施弘一女黃海翊安
明一男施久一女李燭鄭基學三男惟興其
興斯興一女金宗泳金宗衍二男鼎夏鼎元

三女金聲厚李塉柳永輝內外曾玄孫若干
人嗚呼以公才德操履早歲通籍而端慤自
守不與世馳逐故盤桓下位竟未大用使人
不能無遺恨於當時也兌一雖不及拜公而
贅八於公之孫家熟聞公之平生行蹟故不
揆文辭之拙澁而敘之如右云庚辰季秋司
諫宣城金兌一謹狀

家狀

府君諱瑋字潤甫務安人也始祖諱進昇有
功麗代受邑務安仍居焉仕至國學典酒子

諱暹當顯宗播越終始一節以安社稷拜左
僕射文宗時圖形閣上其後世有大官曰諱
元位大將軍曰諱儒曰諱成器皆上將軍曰
諱瑋密直副使曰諱文晤綿城君曰諱允鏐
奉直郎軍簿正郎曰諱義龍八國朝實爲
開國原從功臣嘉靖大夫典兵部書曰諱綱
通訓大夫知順州事曰諱享奉列大夫知丹
陽郡事贈通政大夫禮曹叅議曰諱解燕
山朝爲宣傳官見妻侄任士弘怙寵自恣恐
禍及棄官歸是於府君爲五代祖高祖諱之

蒙古自京徙于寧海府

贈通訓大夫司僕寺

正曾祖諱元基正德癸酉進士祖諱全嘉靖

丙午文科奉直郎戶曹正郎考諱善長萬曆

乙巳文科通善郎慶尚道都事以府君原從

勲贈通政大夫承政院都承旨妣英陽南

氏進士諱夢教愚之女以萬曆丙子十月九日

戊辰卯時生府君于榮川郡花川里府君少

好讀書善屬文癸卯登第年二十八矣權知

成均副學諭轉博士己酉例陞典籍歷司憲

府監察戶曹佐郎庚戌拜工曹佐郎尋拜禮

安縣監甲寅知蔚珍縣令丙辰丁外艱光海
末年爲分兵曹佐郎丙寅又拜工曹佐郎丁
卯陞刑曹正郎俄遷戶曹正郎兼春秋館記
注官時金人來侵兵至平壤朝命愚伏鄭文
莊公號召嶺南而鄭先生以府君啓請爲從
事官戊辰由奉常僉正出守豐基郡兼春秋
館編修官癸酉丁內艱丙子之變假守豐基
丁丑拜成均司藝轉承文院判校禮賓寺正
六月復授判校兼春秋館編修官八月爲舒
川郡守癸未除宗簿寺正乙酉歷軍資監正

丙戌拜善山都護府使己丑棄歸壬辰八月初二日病卒享年七十七葬郡北耳山午向之原今順興府東府君資質溫良器司端重聰明過人明達事理謹厚勤儉篤於孝友凡五得任字未嘗爲子孫長尺寸而其於爲先之事則必爲之盡心力焉薄於自奉而厚於周施所得俸八分贍兄弟之貧者尤不喜華靡之事凡所服用雖在官無異居家之日爲政一以愛民爲心晏寢早起無或少懈到處未始不以育材爲務平居日必正衣冠出處

於外與兄處士公墳唱簫和日夕相對未嘗
須臾離也待人接物一以誠款不修邊幅宗
族稱其婣睦鄉鄰服其忠信若遇先世忌日
則雖年迫八耄致其齋戒以盡如在之誠待
子弟不嚴而整常以修身謹行爲家訓第一
義而又以勿與人較不忌語等事惓惓爲之
戒焉號悔易堂遺稿若干編藏在家娶原城
邊氏諱慶膺之女高麗贊成事安烈之後生
萬曆庚辰卒崇禎後已丑享年七十葬郡東
雪梅洞南向之原有五男二女男長安欽已

卯生負次安復文科禮曹佐郎次安著通德
郎次安學宣教郎次安明將仕郎女長適士
人鄭基學次適士人金宗衍曰安欽四男曰
施雨生負曰施彩施後施繪二女朴炕李珞
曰安復三男施益施達施祿二女成命夏崔
遠基曰安著三男施春俱中生進施夏施秋
四女權霍文科琴慎徽鄭鎬全信重曰安學
三男施昌俱中生進施衡施弘一女黃海翊
曰安明一男施久一女李瑬鄭基學三男惟
與其與斯與一女金宗泳金宗衍二男鼎夏

鼎元三女金聲厚李塏柳永輝內外曾玄孫
若干人府君才德足以大用於世而初出而
仕也值昏朝亂政莫由有爲迨夫 仁廟反
正年已衰晚而又不合於時論位滯于卑曾
孫天柱謹述

墓碣銘

公諱瑋字潤甫務安人其上祖進昇仕高麗
官至國學典酒其後世子孫連世爲大官有
諱文晤以功食采于務安八 本朝有諱義
龍官至兵部典書數世有諱解登武科爲宣

傳官見燕山政亂棄官歸鄉里以終是於公
間五世曾祖諱元基成均進士祖諱全登文
科爲戶曹正郎考諱善長亦文科爲慶尚都
事以公嘗有原從勞 贈承政院都承旨妣
英陽南氏進士諱夢敷之女以萬曆丙子某
月某日生公於榮川郡之花川里幼穎悟好
讀書善屬文年二十八始釋褐由成均學諭
轉博士由博士爲典藉俄遷司憲府監察爲
戶工曹佐郎尋出爲禮安縣監秩滿待次復
拜蔚珍縣令天啓丁卯入爲刑戶曹正郎時

仁祖大王卽位之五年也春狄人來侵大駕
幸江都鄭文莊公受命號召嶺南公以從
事官從未幾虜撤還八爲奉常僉正俄出知
豐基郡事丁丑拜成均司執轉承文院判校
尋出爲舒川郡守後由宗簿正移軍資正乙
酉拜善山府使戊子解綬而歸壬辰八月某
日考終于家春秋七十有七以某月某日葬
于郡北牛耳山午向之原夫人原城邊氏禮
賓正諱慶膺之女先公四年卒葬在郡南雪
梅洞有丈夫子五人女子二人男長曰安欽

成均生負次安復禮曹佐郎次安著通德郎
次安學宣教郎李安明將仕郎女皆爲士人
妻鄭基學金宗衍其壻也生負有四男二女
男長施雨亦生負次施彩施後施繪女長適
士人朴炕季適士人李珞佐郎有三男曰施
益施達施祿女二人適士人成命夏崔遠基
通德君有三男長施春生進俱中次施夏施
秋女四人文科權憲士人琴慎徽鄭鎬全信
重爲之壻宣教君有三男長曰施昌生進俱
中次施衡施弘一女爲士人黃海翊妻將仕

君有一男曰施久有一女適士人李瑁鄭基
學有三子曰惟興其興斯興金宗衍有二子
曰鼎夏鼎元內外孫曾男女凡數十人公爲
人慈詳端重溫厚和平居家孝親友兄弟謹
喪祭敦嫺睦每有所得必頒施親黨以爲義
在官爲政恂懾無華一以愛民爲主所至雖
無赫赫聲事理而民不擾筮仕五十年歷官
內外累典大邑自奉無異寒士未嘗長尺寸
立資遺爲子孫生產計常惓惓以謹言勅行
不與人爭較是非教戒子若孫嗚呼若公者

可謂貴而能貧滿而不溢者也公以先世丘
墓之寄於寧每時節往來瞻掃玄逸兒侍先
君子之側荷公獎與之意甚厚俛仰今昨甲
子殆將一周矣每想公真醇溫雅之風未嘗
不感歎欽慕焉一日公之曾孫天柱以公會
孫壻前司諫金君兌一之狀授玄逸曰請爲
銘玄逸顧念先契之重不敢以不文辭遂据
其狀撫其實而銘之曰

詩著溫人維德之基世漸穀訛淳風日漓於
惟朴公子諒愷悌不隨俗遷惟古是契款款

其行循循其政秉心謙冲物莫與競牛耳之
原有窅其隧銘于墓石以篤來裔安陵李玄
逸撰

花川別祠奉安文

李仁行

恭惟府君佑啓吾門水西艮男三松輅孫英
才篤學早歲釋褐迹不安朝五綰外紱政先
愛民身如寒士不隨俗遷安我素履日整冠
襟唱和麓壩奉先克孝處宗惟敦訓迪後人
謹言勅行秉心謙冲趨向是正根培葉茂蘭
玉盈庭六蓮雙桂膝下光榮貽謨是在豈啻

簾金遺昆有賴箕裘建今宗祀壇革在禮當
桃羣情有盡緬懷靈苗德敢忘報義或可起
古人有行若陳董氏爰謀宗黨乃立別祠心
獨無忤歲再奉盥茲消吉辰肇舉精禋凡此
駿奔孰非仍雲風猷宛昨如聞歆噫其始自
今勿替引之

常享祝文

清慎莅官文行裕昆澤深覆露永世不謗

別祠重建上梁文

權璉夏

遺澤歷累世不湮春秋之報祀匪懈老屋闕

五紀易侈雲仍之肯構維新豈曰增修聿追
來孝奧惟串川里肇業實有悔易公分支天
花櫨叢王母之蟠桃結子月桂蓮萼李郎之
寶樹先開爲政一家著孝友德行之懿歷治
五色頌循良廉白之稱幼襲松翁之教方允
爲宅相出膺愚老之號召克贊戎猷歷四親
而於乎不忒別祠而茲焉虔奉心無窮而
分有限先王之制不敢過義以起而禮或然
前賢之論有所據斯爲追遠報本之美意兼
舉敦宗修睦之良規裕後而諸昆克敏罔非

功德之攸暨異廟而其室孔邇可想精氣之
流通夫何星霜之寢多漸致桷桷之將圯輦
基厚址縱有嗣守之不佞言上雨傍風去思繕
修之是度乃與宗黨合議復諏日時經營地
步稍移方位面勢之是審制度仍舊礮斲塗
塹之惟修寫隴材而來昆效誠趁農隙而工
役齊力丹花綻藥正當雨露之辰絳玉畱痕
緬想杖屨之馥於焉安侑之有日庶期福祿
之貽茲愜然僂然如見溫厚豈窮之德色是
繼是述益篤孝悌謹敕之家謨敬述諸宗合

辭庸助六偉善頌拋梁東龜灣一曲儼明宮
莫言畏壘今荒廢前輩藏修在此中拋梁西
十里眞源湖竹溪雲院當時絃誦地應隨學
子此焉棲拋梁南長溪繞去下成潭源流滾
滾終無極賢澤分明永二字拋梁北小白山
光天與直鐘得興州氣蜿蜒英賢終古幾胚
毓拋梁上昭昭屋極垂天象神明一氣相流
通想像先靈同陟降拋梁下平田穰穰多禾
稼曾孫歲歲供粢明報賽年功釐爾設伏願
上梁之後休嘉鼎至門闌益昌朱紱方來世

襲祖子孫曾蟬赫之餘蔭素履是守復振德
崇文學儒術之遺徽

挽詞

金應祖

半生功業在陳編先輩遺風一脉傳鴈塔名
高才已售鵷班迹屈命何遭榮光四世渾如
夢慘禍頻年莫問天回首林泉播馥地流光
不廢有花川

又

金汝煜

短小誰知大丈夫精神文采兩清臞丹心白
髮三朝老玉色金聲問世儒福祿方期人膾

炙高明那識鬼揶揄憂傷遽嗇仁翁壽哭爲
邦家又哭私

又

金鑒

早歲扶搖九萬天英才雅量世推賢一經已
有傳家業五郡曾無坐客氈絳玉方期仙母
壽白鷄還促哲人年從今忍過西門路喬木
依然鎖冷煙

祭文

伯兄璫

惟靈明敏之才功不輟登第之年二十八具
慶堂前親心悅榮養葬祭致豐潔歷仕三朝

心如一屢典五邑務字恤罷官歸來無儲粟
膝下蓮桂榮幸極家食心安簞瓢足庶幾終
老任閒適如何不吊連失子疾病轉加終不
起二子諸孫誠孝至卜山擇日葬以禮嗚呼
哀哉欲說平日友愛之情則只增傷欲說今
日葬埋之懷則已斷腸何不先死於君死之
前抱此無涯之慟而自不能忘也嗚呼哀哉

又小祥時

維萬曆癸巳八月十四日家兄璫謹以薄奠
慟哭于公第承文院判校之靈曰年光急於

流水練日忽焉斯臻哀隻影之誰依自涕淚
之霑巾况接語而無形或夢見而非真抱千
端之悲懷奠一酌而傷神嗚呼慟哉

又

全益禧

維萬曆癸巳二月戊戌朔十三日庚戌門生
通訓大夫行忠清道都事兼春秋館記注官
管山全益禧謹以酒果之奠哭于承文院判
校朴先生之柩前嗚呼公以精明之質孝友
之行夙承詩禮之訓仍陞鴈鷺之班八校槐
院聲彩騰譽出典州郡惠政治民處鄉而人

無怨言誨人而多有成材茲豈非公之實蹟
耶至於食報于天蘭玉滿庭桂蓮交輝嶺中
人士嘖嘖談公門不已而夫何十年之間灾
禍踵至使公摧裂而至於此耶嗚呼慟哉以
公之才之美位不滿德豈天之宵宵理之冥
冥而然耶意者毓慶于後以昌大門闌耶顧
余不才早蒙拊頂之恩感佩銘心思欲圖報
而歲在乙酉忝宰海邑拜公于京邸公以古
體詩一篇為贐皆是勸戒獎許之語至今珠
玉藏畱篋笥時一展見自不覺雙淚霑襟也

嗚呼慟哉上年秋適有湖西狼貝之行顛倒
踰嶺還家疾作閉戶呻吟久鉞趨哭而日月
屢換公之卽遠之期已在明矣慙負幽明無
面可舉公能諒余情而恕余罪耶奠具雖薄
向慕誠深公如有知庶幾一歆

又

里塾儒生

惟靈簡毅內涵冲和外酣器宇不凡其守也
莊其發也剛旣直且方早業文藝勤苦自勵
其志已銳正襟經席琅然講讀考官動色受
恩天庭歸以爲榮大振家聲三朝恩遇五州

父母致用未究夢斷銅魚興酣松鱸左右圖
書瓚粟無儲生事蕭疎吾心晏如餘慶未衰
家道日肥蓮桂交輝塤箎迭吹棊酒忘機此
樂怡怡如何德門竟遭中屯慘禍頻繁重致
摧傷遐筭還忙脩夜不暘鄉無耆德士失矜
式疇不痛惜某等幸接德鄰受誨最親幾承
光塵勸課爲事多所成就依歸有地今其已
而百年堪悲我輩誰依敬奠單酌以寓忱曲
庶幾歆格

贈遺

絲玉杖序

朴郎中潤甫與余同寓三門外以暇日相從甚款一日訪余曰往在癸丑歲先君子赴嶺幕過辭于太學士五峯李相公則相公出一策贐之曰此中朝之玩世所謂仙人絲玉杖也聞大夫人今春秋九十有六敬以此爲大夫人壽大夫人千歲厭世之後付之龜鶴主翁翁沒令其家還我可也先君子拜受而歸以獻于王母王母以爲榮倚之堂壁作一家珍寶而不敢杖蓋王母年雖高步履輕捷上

下堂不用扶故也歲戊午王母年百有一而終是時先君子已早世琯不敢忘先君子所詔太學士之言卽送于龜鶴金公金公尋亦下世則完璧之責專在於琯而惟是曠世珍物不敢付之隸人或爲匹夫之璧久矣今琯將躬納于太學士請一語以歸而恨不得階主焉願子先有以倡之使琯有所藉而請則幸矣余曰詩非所能杖可得而見乎翌日以杖來諦視之儘奇焉蓋以爲竹也則浮輕而非竹矣以爲葦也則堅韌而非葦矣雕刻之

所成歟則泯然而天矣造化之所爲歟則皖然而巧矣且凡物之堅者必重其輕者必脆之杖也運之於掌而不下墜委之以身而不撓折殆不可以理究矣獨其叩之而其聲訕然拂拭之而其光溫然非玉而以玉名者其或以此歟抑人之寓物於人也雖時月之間有毀焉有失焉不如期者常多焉今太學士之言始若因戲而發而終始沕合於十四年之後太學士今年七十有四而耳目聰明神氣惺然宜其作地上仙人而之杖之來自中

華遷于嶺表復返于太學士者庸非數耶吁
奇矣桃竹赤藤一尋常物耳而得二老之詩
以名於宇宙况之杖也耶以此告于太學士
則太學士其必不靳矣丙寅閏六月既望愚
伏道人鄭經世書于城南之寓舍

送朴潤甫赴任基川序

朴潤甫將赴基木余訪之潤甫餉以酒余命
從者賚其肴潤甫曰是將以遺穉子耶余曰
唯唯既而有臧臧於中者矣傳曰老吾老以
及人之老幼吾幼以及人之幼今君之觴我

是老老之推也見我賚盤飭認其爲饋幼是
幼幼之推也以此而推之於政其知爲治之
本乎余觀今之爲政異於此矣謂頑悍之民
非教化可馱視之如草芥鞭之如蛇虺以致
遠近怨咨父子流散猶莫能省已徒歸咎於
民俗之難化大學絜矩之道恐不然也今潤
甫之意獨如此一方之人孰不視太守之政
而各自觀感於心也亦豈有民興於孝慈而
患治道之不成者乎孟子曰古之人所以大
過人者無他善推其所爲而已願吾友之推

而長之使人人之興起也老人嘗莅是郡無
片善及民而乃於今日觸事有感遂書其事
以相勉亦古人不忘桐鄉之意也且附一律
于其後潤甫曾爲縣有風績蓋所謂知治道
者也

小白南墟水石幽昔年於此暫分憂爲官自
愧無遺愛送客那禁憶舊遊老幼從今均飽
煖間關隨處徧歌謳秋風欲理南歸棹準擬
相尋錦水頭

崇禎紀元之清和初一蒼石李垓書于終

南寓舍

朴潤甫來松巖共話

金榮祖

故人聞自水東來
郭外長遷策馬迴
山帶晚晴青萬匝
眼逢佳客碧雙開
棊分龍虎交爭陣
酒引葡萄滿酌杯
乘興莫言歸路黑
夕陽扶醉下松臺

畏影堂會敬次悔易先生憶昔行韻并

小序

琴養靈

不佞自幼聞悔易堂兄弟以文行名
於時而與風雷軒筆峯丈及吾先君

交最厚如兄弟然真道義交也及吾
先君不幸早世而諸丈人能康健不
衰每一陪遊未嘗不感歎流涕也今
歲九月諸丈相與期會于畏影堂年
皆七八十蒼顏白髮脩然地上仙也
執酒相對疊疊不能休噫諸公皆先
君舊要而尚優遊康樂如此又有子
若孫環侍左右先君下世忽忽已二
十年而獨不肖兄弟陪叅末席則愴
感之懷尤當何如也翌日悔易先生

作憶昔行一篇命一座咸和之不佞
不敢以不才辭謹述懷仰次焉

甲申秋九月旣望中宵月色多一年衆仙來
會畏影堂竹羅棗栗酒聖賢金公標格本孤
直號取易卦風雷益可惜才命不相謀青溟
至今垂鵬翮悔易丈人早擅聲高詞自擬南
薰賡邇來時事混黑白林泉散地送餘生筆
峯自是珠潛泥雲中幾年事養鷄少年然諾
今猶在楓林此日相招攜賤子終天歲二十
陪遊倍感風樹急各有子弟陪頽頽惟我第

兄未侍立天乎天乎其奈爾人間忽忽無樂
事坐中諸丈皆康健蒼顏白髮渾相似憂愁
幽思休一笑各說當時皆壯少憶昔行成命
步韻才薄其如語未到

憶昨天柱崩摧日乃是崇禎丙子年祖宗二
百年文物蒼黃一朝輸右賢將相不能文直
錢一士自刎竟何益我欲拔劔斬長鯨瀚海
漠漠無六翮至今猶聽刁斗聲舜做未聞南
風賡狼煙漲天關月壯長城歲歲驅蒼生空
懷慷慨困塗泥中宵三歎起聞鷄吾鄉丈老

幸無事溪山秋日相扶携或年七十或八十
自歎人間烏兔急一杯酒十年情明月滿庭
松檜立世事如今勿說爾良宵此會真樂事
衣冠甚偉鬚眉白太平氣像依依似各說平
生相對歎皆是當時之年少攄盡幽懷夜何
其卧看落月西山到

敬次憶昔行韻

并序

金秋吉

秋吉嘗讀古人之文見有招朋把酒
吟風咏月者未嘗不樂其樂矣今伏
覩畏影堂會然後始笑古人之不得

眞樂而自幸於吾身親見之也家君
與悔易朴丈人筆峯余丈人皆平生
道義交也一日相與約曰吾數人相
住不十里地不得聯枕打話者今四
十年有餘矣盍謀會宿一處以繼疇
昔少年事乎於是期于畏影堂取地
勝也卜以九月既望取宵良也是日
也二丈皆如約家君亦往赴焉蒼顏
鶴髮鼎坐相對穩討情懷商確古今
亦有老少五六人同之月色如晝衆

囂俱寂壁間青燈耿耿相照而語眷
眷不能休夜欲子各就枕而卧東方
未白衣服冠而坐又繼昨日之餘歡
焉秋吉與兩家子弟環侍左右喜慶
之極直欲抃舞而不能已也噫今日
之會豈偶然哉人生于世樂莫樂於
彩舞而今我數人各奉杖屨陪歡一
堂此人人之所願慕而不能得者也
其爲樂不特古人之招朋吟咏而已
則人間真樂復有大於此者乎世之

人非不知此樂而曾無一人樂此而
形諸吟咏者豈不以此樂在天不可
以圖得者存也耶將罷歸朴丈人作
憶昔行一首歌詠此事仍令在座之
人和之秋吉雖不文旣得古人不能
得之樂於已而又歎無一人之吟咏
此真樂者矣其於丈人之命何敢辭
乎謹拜手奉次略敘其顛末云

請問天開地闢日爾來于今幾千年其間勝
事傳者多孰如畏影集羣賢羣賢昔日好友

直氣味相合作三益年來多事聚無期兩腋
恨未生風翮相思十里不聞聲縱得好句誰
能賡飛書約繼少年遊是時秋月魄哉生儻
來軒冕塗與泥何如此夕共黍鷄雷談高論
襍詼諧眷眷眼日相追携且有老少盈數十
共惜邛鷄報曉急小子何幸陪杖屨歡意浚
浚猥侍立誠知此會非偶爾何羨蘭亭修契
事悔易先生歌憶昔長杠健筆誰與似唐突
續貂雖可笑自詫此樂知者少安得長繩九
萬尺繫日長住天心到

奉贈悔易老兄拜 恩之京

權省吾

重午佳辰近賜衣
泮宮司業夢天扉
朋情忍對黃鸝鳥
別書札應隨白鴈歸
經亂山顏到處
是沿途店主幾人非
仙曹若問塵寰事
爲報飢氓困採薇

猥綴別懷呈城主朴公遽還行軒

全滢

萬死餘生性命全
白頭無路再聯翩
殘年計活盤中糞
亂世知心月下鵲
賴有使君承寵

渥豈期今夕遽離筵自憐野老如烏鵲謾向
歸輶擁後先

天爲斯民惠我侯暫勞鳬舄下西州三還始
信謳歌遍五袴端宜舉最優那意黃言生肘
腋便教珠誦達宸旒花山此去千餘里直
恐炎程雨未休

赫日當空草欲枯萬邦疑是鼓洪鑪三封北
上人何去八馬東還路更迂鸚鵡杯傾山雨
細驪駒曲盡野禽呼他時儻見吳州月須憶
西岡一老夫

跋

朴寢郎世鉉氏嘗語相翊曰吾先君悔易公
遺文不宐泯沒也篋而顧蒐輯未良零星無
詮次惟吾子梳整爲示後圖因有以識之也
相翊鄭重不敢唯日其族君世任甫又袖致
而申命之義敢終辭諸余惟綿城氏之世昌
翫于宣仁之際蔚然以科第文學爲家
若悔易公以水西翼子被三松畫獅之誡敦
厚忠信固有西京長者之風旣又從愚伏蒼
石忘窩鶴沙諸先生遊薰沐而切劘者斤斤

皆道義也矧早歲策名歷典大郡而憂國字
民之外未嘗長尺寸爲子孫資誠熙世之蓋
臣而儒門之耆造也以故當世諸賢或以治
縣風績許之或以玉色金聲讚之葛庵李先
生又以爲貴而能貧滿而不溢而有眞醇溫
雅之風噫盡之矣何贅焉公於文未嘗刻意
爲之而隨手著鐸贍暢可讀詩尤清雋有體
裁如傷春辭次老杜北征詩諸篇皆丙子以
後之作而惻愴慷慨憤國恥嘔心血使人
讀之不覺有嘗膽洗日之思其有補於風教

者爲如何也相翊瞻陋甚然忝在公外裔之列景慕之私有切於人者謹綴成書始末而略及行治如此非敢以爲發懿蹟之萬一也公伯兄東川公諱璫晦處林樊秉節義敦儒術有聯璧之譽今其所著東川集藏于家云歲壬子三月小晦外裔孫永嘉權相翊謹書

悔易堂集卷之二終

附草堂逸稿

詩

挽李文成杞

慟矣吾公逝春山淚濺花處鄉言有春居室行
無瑕膝下兒孫衆人間壽福遐新阡看弔鶴行
路亦咨嗟

挽三從兄掌令敦復

清儉牧謙卑天姿出等夷南州饒衆望東海騁
雄詞直氣乘驄日仁聲卧轍時卽今俱已矣我
淚自漣洏

策

殿策 已卯登甲科

王若曰云云臣聞召公奭告成王之言曰王其疾敬德祈天永命臣於是知祈永命之道在於敬德也臣又聞子思有言曰大德必得其壽臣於是知得壽者之道在於大德也臣又聞傳說之言曰念終始典于學厥德修罔覺臣於是知爲學之要在於修德也臣嘗味此三言竊以爲爲人上者不修德則已苟能修德則可以永命可以壽者可以盡爲學之道矣思以一德二字

達之於冕旒之下而顧未有路耳不圖今日
幸從三十人後稽首咫尺階下仰見金章昭揭
玉音丁寧惓惓勤勤於祈命養形懋聖學三
件事嗚呼自古立王生則逸不知天命之可永
形氣之可養聖學之可勉殿下之問及此吾
王庶幾無疾病乎庶幾懋學而永命乎臣雖
愚昧敢不對揚休命之萬一乎臣伏讀聖策
曰予聞世間止至於聖人歟臣雙擎跪讀方寸
自激臣竊伏念爲國有道得其道則能至於祈
天永命養形有術得其術則能至於延年爲學

有要得其要則可至於聖人此所以事有三件工夫一般而可以奪造化之力者也是以古之君子先盡在我之道以祈在天之命而所以養形所以爲學無所不用其極則天命不期永而自永聖學不期明而自明雖或有壽命之不齊而或然之數何足多辨哉嗚呼惟天無親惟德是輔爲國而不本於德則無以永命養形而不本於德則無以延齡爲學而不本於德則無以造聖域是以三者一德爲貴稽之於古所其無逸天命自度而懋敬厥德不敢遑寧則八百其

曆非幸也宜也鞭笞九有蔑視百王而顛覆厥
德縱欲無厭則二世而亡非不幸也亦宜也聖
矣夫子壽不及於堯舜賢哉邵雍年未過於諸
賢噫養形之善莫如聖賢而氣數之變先儒有
論則臣何敢贅議哉顏曾思孟傳聖道於前而
宋朝諸賢繼四聖於後發揮性理開示後學使
二帝三王之道復明於天下後世則前聖後賢
其揆一也嗚乎有聖人之德有聖人之學則天
命可永 聖壽可長伏願 殿下懋哉懋哉臣
伏讀 聖策曰予雖否德止可得以致之歟臣

雙擎跪讀方寸自激臣伏覲 殿下念負荷於

春冰懷御奔於秋駕癸亥以後無非圖治之日
而乙夜憂勤盡是修省之道兢兢焉業業焉不
敢自暇自逸以迓續天命爲務以背理徇欲爲
恥而遜志時敏者惟在於古聖人遺訓則天休
宜其滋至民心宜其悅服純佑 聖躬邦乃其
昌而竊怪夫邇年來天不悔禍災沴殄臻民失
常心怨咨朋興而至于今日 玉體靡寧源委
不淺未見勿藥之喜尚有彌畱之憂噫仁如
殿下明如 殿下好問學如 殿下而食效無

期憂濩曩日國勢抗捏罔知攸濟者何也是果
殿下之所以爲國者未盡其道而然耶抑存
以安危否奉之機伏於冥冥之中而今日之憂
乃所以玉成者歟臣竊憂悶默求其故猶有所
懷於胷中則安敢避僭越之誅不盡言於初見
君父之日乎傳曰甘言疾也苦言藥也臣請
以苦言之藥進於殿下願殿下小嘗之嗚
乎殿下於卽祚之初夙宵寅畏慮善以勳聲
色玩好未嘗一經於心政教號令惟以渙汗爲
務罔敢怠荒念茲在茲故舊邦惟新天心克享

國有治安之效民無怨上之心曾未數年漸不
克終委靡偷惰之漸日見於言語政事之間而
莫之悟莫之改馴致一紀之內國未忘難臣民
之痛社稷之羞慘不忍言而 殿下猶未盡
於修省之道外焉而政多疵吝內焉而宮闈不
嚴大有以損傷國體小有以墜廢細務上而召
天災下而招民怨衰亡之兆不一而足則憂危
之甚豈不足以傷天地之和致疾病之來乎噫
天災時變同萃於 殿下之時而 殿下之違
和又丁此時則可不思所以變其舊而致其平

乎臣聞以德養心則心無不和心無不和則身
無不和而國家之治安可以卜矣伏願 殿下
繼自今惕然而念反已而求懋昭大德餽眞積
力久內省不疚自然心和氣和而身無不寧國
無不治矣何憂乎聖學之未明何患乎 聖躬
之有疾何慮乎天命之未永乎伏願 殿下畱
神焉臣伏讀 聖策曰子大夫止予將親覽焉
臣雙擎跪讀方寸自激臣聞堯舜克明德而享
年久長三王昭大德而曆年久遠以堯舜三王
之心修堯舜三王之德而必以欽之一字爲修

德之大要則我 殿下之德之壽之永年可與
堯舜三王匹休矣嗚乎 殿下其監于茲臣謹
對

附錄

墓碣銘

公諱安復字仲雷其先新羅王者之後高麗
時有諱進昇爲國學典酒有子曰暹當顯宗
時以功位左僕射圖形閣上其後連世爲大
官有諱文晤封綿城君子孫因稱以自別八
本朝有諱義龍官至兵部典書於公間九世曾

祖諱全戶曹正郎祖諱善長慶尚都事考諱
理歷典五郡卒官承文院判校三世皆以文
科顯妣原城邊氏禮賓正慶膺之女以萬曆
辛丑某月某甲生公幼聰穎異凡兒讀書爲
學不待強教文理自通天啓甲子補上舍生
及年三十九始釋褐由司穰長興兩司直長
轉成均典藉甲申遷司憲府監察乙酉爲禮
曹佐郎尋以寧親予告還鄉里念兩親年考
既高遂無意仕進自是放閒丘園經籍自娛
非甚病未嘗一日去手其在親側油油翼翼

兄弟之間怡怡如也已丑丁母夫人憂喪致
哀祭致敬有過人之行壬辰從判校公往妹
壻鄭基學家偶感疾不起春秋五十二嗣子
施益以其喪歸以是年某月某日葬于順興
府治東池洞巽向之原公初娶載寧李氏宜
寧縣監 贈吏曹參判諱涵之女早卒無子
女繼室昌原黃氏處士諱胤季之女生三男
二女男長施益次施達早夭季施祿女適士
人成命夏崔遠基施益有子五人曰震說震
高震稷震極震轍餘男又二人震光震良施

達一子曰震弼施祿亦一子曰震憲曾孫男
凡十二人公性孝慈詳順溫雅簡重居家處
鄉黨與朋友交皆極謹慎不掛於過差人皆
愛而敬之去公捐館今五十年一日公之胤
子施益狀公之行使其弟施祿辱以示玄逸
請銘其墓曰施益等不幸早孤先人墓道尚
未克表其在于今先人之友無在者莫可以
屬筆惟吾子既世通家施益之先妣卽公之
姑也必詳知吾父事盍以所見聞者爲我書
之玄逸顧念分義不敢以不文辭輒據其狀


參以舊聞序以銘之曰

朴氏羅麗世爲大姓勲名策書相繼煥炳由
曾及考通籍金門公趾其休亦擢以文進塗
旣闢庭闈齒耆堂豈曰忘世亦惟愛日居家孝
友是亦爲政惟其不匱戴美世令宰如之阡
有崇芥屋我銘其石來裔是篤安陵李玄逸
撰

附草堂逸稿終

惟我十代祖草堂府君卽悔易堂先祖第二
胤也嗚乎我家累經桑海巾笥遺文散逸殆
盡茲豈非可恨者耶就審葛庵李先生所撰
墓碣則府君之登朝事蹟孝友學行瞭然如
隔晨感慕之情尤當何如也今因悔易堂遺
集剞劂之日附載草堂逸稿詩二首 殿策
一通隻字短編足以爲後昆觀感之資何必
多乎哉歲壬子端陽節嗣孫世鉉謹識

冬平角苑二千餘畝種稻餘種世種稻
一畝受宇政論只以陽地畧畧之數四
畝除四之戶一畝年產米萬餘石二畝
兩畝知象之利也者何收也今因種桑
桑田明林故之桑田產米又半竹細柳
盡產宜非何則昔種稻者必率夫主而
以和平之利實利來利中於起天利
幾十分之四草堂所種四種桑竹細柳二



新

新